

# «Las perspectivas financieras restan tendidas»

La ministra da finanzas Barbara Janom Steiner ha dà pled e fatg davart il quint chantunal 2015

CUN CUSS. GUV. BARBARA JANOM STEINER  
HA DISCURRÌ MARTIN CABALZAR

■ Era quest onn ha la ministra da finanzas dal Grischun Barbara Janom Steiner pudì preschentar in quint chantunal cun in retgav empè dal deficit prognostigà. La Quotidiana ha discurrì cun la scheffa dal departament da finanzas e vischnancas davart las perspectivas finanziaras da l'avegnir.

*Sco usità ha il chantun Grischun era savì preschentar quest onn in retgav enstagl d'in deficit prognostigà. È quai tactica, casualità u datti persuerter motivs nunprevisibels?*

**Barbara Janom Steiner:** Damai che ina gronda part da las entradas dal chantun deriva da la confederaziun è dependenta dal gudogn da la Banca naziunala n'è ina budgetaziun precisa betg adina pussaivla. Damai ch'i veva dà l'onn precedent nagin gudogn ed uschia era nagina dividenda hai dà 2016 ina dubla distribuziun da la Banca naziunala che ha purtà sorprendentamain al Grischun ina summa da 32 milliuns.

*Era las entradas da taglia en pli autas che budgetà.*

En vista a la difficila situaziun economica avain nus daveras era budgetà plitost precaut las entradas fiscalas che èn la finala stadas meglras che budgetà. Era sche las entradas han surpassà 2015 il preventiv per 55 milliuns ston ins tuttina vesair che ellas èn stadas 2015 per 17 milliuns pli bassas che l'onn precedent. La gronda part da l'augment da las entradas da taglia han las persunas naturalas effectuà cun radund 28 milliuns.



La ministra da finanzas Barbara Janom Steiner ha preschentà ier a las medias il quint chantunal 2015.

FOTO O. ITEM

*Da tge facturs resultan expensas pli pitschnas?*

Expensas pli pitschnas resultan da differents secturs sco main investiziuns materialas ed immaterialas, main imprests e main contribuziuns a terzas persunas. Las investiziuns nettas han muntà a 163 milliuns. Quai è radund 35 milliuns pli pauc che budgetà, dentant essenzialmain dapli che l'onn precedent.

*Tge effect ha la devalurisaziun da las aczias da la Repower gi sin il quint chantunal da 2015?*

Las rectificaziuns da la valor da las aczias da Repower figureschan en il quint chantunal cun ina reduziun da chapital da 91 milliuns. Il svilup cuntrari han ins legravlamain pudì constatar tar ils cedels da participaziun da la Banca chantunala che ha augmentà sia valita per 112 milliuns e las aczias da la Ems Chemia Holding che ha agumentà sia valita per nov milliuns. Plinavant avain nus pudì crear in fond da reserva per finanziair infrastructures relevantas per il sistem che è dotà cun 80 milliuns. Tuttina ha il chantun anc adina in agen chapital da 2,3 milliardas. La

basa finanziaria da noss chantun dastga perquai tuttina vegnir considerada sco solida.

*Il Grischun profita er essenzialmain da la gulivaziun da finanzas interchantunala. Il squitsch dals chantuns ritgs d'adattar il sistem en lur favur daventa adina pli ferm. Co vesais Vus las perspectivas da l'avegnir ord optica grischuna?*

Il parlament federal ha acceptà il nov plan da gulivaziun che vala per ils proxims quatter onns. Quai dat als

chantuns ina pli gronda segirezza da planisaziun per ils proxims quatter onns. Tge che capita alura n'è anc betg cler. En scadin cas vegn ins a stuaier far tschertas concessiuns als chantuns che alimenteschan il fond. Il sistem da gulivaziun sco tal è dentant cumprovà ed acceptà, adattaziuns punctualas èn dentant pussaivlas.

*Tge effect ha il terz pachet da taglia sin interpresas III che vegn tractà quests dis en il parlament federal sin las finanzas chantunalas?*

En scadin cas vegni a dar damain entradas per ils chantuns. Sco ministra da finanzas chantunala fan las concessiuns fatgas dal parlament en favur da las interpresas quitads. Schebain i dat in referendum vegn la finala a depender dal resultat da la tractaziun finala en il parlament.

*Co vesan las perspectivas finanziaras dal chantun ora per ils proxims onns?*

Las perspectivas finanziaras da l'onn 2016 vegnan ad esser cleramain mendras che quellas dals onns precedents. Da 2017 fin 2020 quintain nus cun deficits annuals da 50 fin 100 milliuns. Tals deficits n'èn betg supportabels e las schanzas che la situaziun economica sa megliereschia en quest interval era betg gist grondas. Priorità ha ina rigurusa disciplina da spargn, in augment dal pe da taglia n'è betg prevì. En cas da basegn vegn la regenza a suttametter 2018 al cussegl grond in plan da distgargia cumplessiv, pli u main sco regal da cumià da la ministra da finanzas actuala. Jau speresch dentant che quai na saja betg necessari.